

四庫全書

史部

欽定四庫全書

史部

江南通志卷八十七

詳校官給事中臣丁雲錦

檢討臣德生覆勘

總校官編修臣王燕緒

校對官助教臣羅萬選

謄錄監生臣倪景寬

欽定四庫全書

江南通志卷八十七

學校志

學校之設肇於唐虞至成周而大備記曰家有塾
黨有庠州有序國有學其校之有比年中年三年
九年之期其升之有造士俊士選士進士之等蓋
化民成俗恒必由之而興賢舉能以備四方之任
使亦於是乎在兩漢而後郡縣之學漸次修舉江

南自言游氏興於東吳為聖門文學稱首所謂南方之學得其精華者千百年來積而日盛挾策綴文之士常倍於他省我

國家治平百餘年德化之所涵濡聲教之所漸被薄海內外幾於家弦誦而戶詩書

列聖相承加意作人之化於江南尤渥所以廣厲學宮教
育之使成材者委曲周詳為從古所未有士之隸
名庠序者宜何如砥礪束修以明稱德意紀載者

重之為類三為卷五作學校志第四

學宮一

漢武帝時始令天下郡國皆立學校

平帝元始三年立學官郡國曰學邑侯國曰校置
經師一人

後漢光武時李忠為丹陽太守以俗不好學乃為起
學校

晉太元九年尚書謝石請頒下州郡普修學校帝從

之

後魏天安初立郡縣學

隋仁壽元年詔廢州縣學

唐武德七年詔諸州縣並令置學

宋慶曆四年以范仲淹請詔州縣興學校

五年詔州縣學毋輒容非本土人

熙寧四年州給田十頃為學糧

元豐元年詔諸路州府學官揚州亳州各一員蘇

州一員江寧府一員

崇寧中詔縣學生三歲不赴升試者除其籍諸路
賓興會試辟雖獨常州中選者多知州教授特遷

一官

元至元二十三年設江南各道儒學提舉司詔江南
學校舊有學田復給之以養士

二十五年尚書省臣奏令江南郡縣學田所入美
餘貯集賢院以給多材藝者從之

二十八年令江南諸路學及各縣學內設立小學
選老成之士教之

二十九年詔江南州縣學田其歲入聽其自掌春
秋釋奠外以廩給師生及士之無告者

明洪武二年詔府州縣皆立學府學四十人州學三
十人縣學二十人日給廩膳仍免其家差徭二丁
十五年頒釋奠

先師孔子儀注於天下府州縣學其祭各以正官行

禮有布政司則以布政司其分獻則以本學儒職
及老成儒士充之每歲以春秋二仲月上丁日每
朔望郡縣長以下詣學行香

二十六年頒大成樂器於天下

永樂四年三月帝親謁廟

附

成祖視學記

朕聞帝王之興

必首舉學校之政以崇道德弘教化正人心成天下之才致天下之治唐虞三代之盛率由於茲也我皇考聖神文武欽明啟運峻德成功渡江首建學校親視孔子日引儒臣講論經義求古聖人之道身體力行及統有萬方即詔府州縣皆立學天下士子雲集京師復新作廟學於雞鳴山之陽親

製教條頒布中外又命天下增廣生復其家府州縣皆用春秋祀孔子賜以樂舞德教廣被海外諸國并遣入學教化之隆視古為盛朕繼承大統仰遵成憲乃永樂四年三月朔日躬詣廟庭謁先師孔子前期三日雨將祀之夕卿雲澄霽星緯昭明暨旦天宇穆清明旭鮮麗釋菜於廟退即彛倫堂文武郡臣咸侍左右師儒在席諸生序列堂下命祭酒胡儼等以次講經成禮乃還夫學以明道也道之體廣大光明配乎天地日月而其實不離乎日用之間孔子明之上以承堯舜禹湯文武之治下以為後世植綱常開太平於無窮而世之極其尊崇之禮者非於孔子有所增益特以著明其道之至大天下不可一日而無也爰因視學謹序述所以致隆之本勒碑於廟

正統元年始設提督學校官南直隸以御史為之

嘉靖三年令增應天府學廩膳增廣生員各二十名

二十一年題准直隸金山衛學設廩膳二十名

萬曆六年令南直隸廬鳳淮揚四府滁徐和三州提學以江北巡按兼之

十二年令南直隸提學御史仍兼管江北

國朝順治九年

命禮部頒臥碑於天下學宮碑曰

朝廷建立學校選取生員免其丁糧厚以廩膳設學院
學官以教之各衙門官以禮相待全要養成賢才
以供

朝廷之用諸生皆當上報

國恩下立人品所有教條開列於後

一生員之家父母賢智者子當受教父母愚魯或
有非為者子既讀書明理當再三懇告使父母不
陷於危亡

一生員立志當學為忠臣清官書史所載忠清事蹟務須互相講究凡利國害民之事更宜留心

一生員居心忠厚正直讀書方有實用出仕必作良吏若心術邪刻讀書必無成就為官必取禍患行害人之事者往往自殺其身常宜思省

一生員不可干求官長結交勢要希圖進身若果心善德全上天知之必加以福

一生員當愛身忍性凡有司官衙門不可輕入即

有切己之事止許家人代告不許干與他人詞訟
他人亦不許牽連生員作証

一為學當尊敬先生若講說皆須誠心聽受如有
未明從容再問毋妄行辯難為師長者亦當盡心
教訓勿致怠惰

一軍民一切利病不許生員上書陳言如有一言
建白以違

制論黜革治罪

一生員不許糾黨多人立盟結社把持官府武斷
鄉曲所作文字不許妄行刊刻違者聽提調官治
罪

康熙二十三年

御題萬世師表匾額頌懸 大成殿又 頌

御製學校論曰

治天下者莫亟於正人心厚風俗其道在尚教化以先
之學校者教化所從出將以納民於軌物者也是以古

者家有塾黨有庠術有序國有學人生八歲自王以下
至於庶人之子弟皆入小學及其十有五年則自元子
衆子以至公卿大夫元士之適子與凡民之俊秀皆入
大學蓋自家至於國莫不有學自天子至於庶人莫不
學自幼至於長莫不皆學凡學有詩書禮樂以為之本
干戈羽籥以為之文父子君臣長幼之道於是焉觀之
六德六行之教於是焉取之所以淑其耳目手足之舉
措而養其心以復其性以為修己治人之大者可謂備

至矣是以當時之君子履信思順以事其上小人亦皆樂循禮而恥犯法侯撻不事而至治以興後世學校寔廣博士之途寔繁所以立教之方失先王之遺意士之遊其中者直以為利祿之階欲期道德之一詎不難哉且夫今之所謂教者誦讀焉而已爾而又弗實致其力以防其放僻邪侈之心使氣之充而識之明以漸求復其性其何以為修己治人之道哉故曰教隆於上化成於下教不明於上而欲化成於下猶却行而求前也教

化者為治之本學校者教化之原欲敦隆教化而興起
學校者其道安在在務其本而不求其末尚其實而不
務其華以內行為先不汲汲於聲譽以經術為要不屑
屑於文辭如是則於聖人化民成俗之道庶乎其有當
也夫

四十一年 頌

御製訓飭士子文曰

國家建立學校原以興行教化作育人材典至渥也朕

臨御以來隆重師儒加意庠序近復慎簡學使釐剔弊端務令風教修明賢才蔚起庶幾棫樸作人之意乃比年士習未端儒效罕著雖因內外臣工奉行未能盡善亦由爾諸生積錮已久猝難改易之故也茲特親製訓言再加警飭爾諸生其敬聽之從來學者先立品行次及文學學術事功原委有叙爾諸生幼聞庭訓長列宮牆朝夕誦讀寧無講究必也躬修實踐砥礪廉隅敦孝順以事親秉忠貞以立志窮經考業勿雜荒誕之談取

友親師悉化憍盈之氣文章歸於醇雅母事浮華軌度
式於規繩最防蕩佚子衿能達自昔所譏苟行止有虧
雖讀書何益若夫宅心弗淑行已多愆或蜚語流言脅
制官長或隱糧包訟出入公門或唆撥姦猾欺孤凌弱
或招呼朋類結社邀盟乃如之人名教不容鄉黨弗齒
縱倖脫褫扑濫竊章縫返之於衷寧無媿乎况乎鄉會
科名乃掄才大典關係尤鉅士子果有真才實學何患
困不逢年顧乃標榜虛名暗通聲氣夤緣詭遇罔顧身

家又或改竄鄉貫希圖進取囂凌騰沸網利營私種種弊端深可痛恨且夫士子出身之始尤貴以正若茲厥初拜獻便已作姦犯科則異時敗檢踰閑何所不至又安望其秉公持正為國家宣猷樹績膺後先疏附之選哉朕用嘉惠爾等故不禁反復惓惓茲訓言頒到爾等務共體朕心恪遵明訓一切痛加改省爭自濯磨積行勤學以圖上進國家三年登造束帛弓旌不特爾身有榮即爾祖父亦增光寵矣逢時得志寧俟他求哉若仍

視為具文玩愒弗做毀方躍冶暴棄自甘則是爾等實
頑無知終不能率教也既負栽培復干咎戾王章具在
朕亦不能為爾等寬矣自茲以往內而國學外而直省
鄉校凡學臣師長皆有司鐸之責者並宜傳集諸生多
方董勸以副朕懷否則職業弗修咎亦難逭勿謂朕言
之不預也爾多士尚敬聽之哉

四十三年

御製平定朔漢告成太學碑

恭建碑
亭在學

五十一年奉

旨升祔先儒朱熹於殿內十哲之次改題其主曰先賢

五十三年以宋儒范仲淹從祀稱先儒

雍正元年

諭內閣禮部加封

先師五世王爵肇聖王木金父裕聖王祈父貽聖王
防叔昌聖王伯夏啓聖王叔梁紇改啓聖祠為崇
聖祠兩廡增宋儒張廸從祀

三年

御書生民未有匾額頒立文廟

詔郡縣二祭增用太牢又

詔增先賢蘧瑗林放秦冉顏何牧皮縣亶公都子樂克公

孫丑萬章先儒鄭康成諸葛亮范甯尹焞黃幹陳

淳何基魏了翁趙復許謙金履祥陳澔羅欽順蔡

清陸隴其從祀升周敦頤張載程顥程頤邵雍為

先賢兩廡東廡首蘧瑗西廡首林放列叙先賢先

儒共一百二十三人位次

欽頌存學書目

上諭十六條

康熙二十四年頌

周易折衷

朱子全書

康熙四十年頌

九年頌

御製萬言廣訓

雍正三年頌

朋黨論

雍正三年頌

瑞穀圖

雍正五年頌

上諭

雍正八年頌

聖祖御纂詩經傳說彙纂

書經傳說彙纂

春秋傳說

彙纂 性理精義

共四部雍正九年布政使司

刊刻大板存貯各省會府學聽人刷印

御製平定青海碑

雍正三年頒恭
建碑亭在學

各府州縣入學額例

國朝順治五年定額府學六十名大學四十名中學二十
十五名小學十二名順治十五年定額府學二十
名大學十五名中學十二名小學八名康熙二十
八年定額府學二十五名大學二十名中學十六
名小學十二名雍正元年定額人文最盛之地大

學照府學中學照大學小學照中學

武童歲科並試額取府學二十名大學十五名中
學十二名小學八名

雍正四年蘇松常淮揚太六府州分縣文武入學
額數與原縣兩分十一年陞徐州為府以州治為
銅山縣府縣入學名數與各府同十二年壽州分
置鳳臺縣入學額數縣與州分十三年陞潁州為
府以州治為阜陽縣府縣入學名數與各府同

江寧府

江寧府儒學在府治北宋置學於鍾山之麓天聖中移建府西北景祐間徙於府治之東南元因之明洪武初改為國學十四年別建國子監於雞鳴

山下遂復為應天府學正德間重修附王守仁記

應天為京兆其學蓋東南教本也在國初以為太學至洪武辛酉而始改創再修於宣德之己酉自是而後浸以敝圯正德士中府尹張公宗厚始議新之未幾而遷中丞以去今中丞白公輔之相繼為尹乃克易朽與頽大完其所未備而又自以其俸餘增置石欄若干楹於櫺星門之外於時府丞

趙公時憲亦協心贊畫故數十年之廢一旦修舉
煥然改觀師模士氣亦皆鼓動興起與廟學一新
教授張雲龍訓導戴章陳義黃森何奎邢越與合
學之士二百有若干人撰叙二公之績徵予文為
記予既不獲辭則謂之曰多師多士若知二公修
學之為功矣亦知自修其學以成二公之功者乎
夫立之師儒區其齋廟昭其儀物具其廩庖是有
國者之立學也緝其敝壞新其朽墁給其匱乏警
其墮弛是有司者之修學也而非士之修學也士
之學也以學為聖賢聖賢之學心學也道德以為
之地忠信以為之基仁以為宅義以為路禮以為
門廉恥以為垣六經以為戶牖四子以為階梯求
之於心而無假於財費也其事不亦易乎修之於
身而無假於雕飾也其功不亦簡乎措之於行而
無不該也其用不亦大乎三代之學皆此矣我國
家雖以科目取士而立學之意亦寧與三代異學

之弗立有國者之咎也弗修焉有司者之責也立矣修矣而居於其地弗立弗修是師之咎士之恥也二公之修學既盡有司之職矣多師多士毋亦相與自修其學以遠於咎恥者乎無亦擴乃地厚乃基安乃宅開乃門戶固乃垣墻學成而用大之則以庇天下次之則以庇一省一郡下之亦以庇其鄉閭家族庶亦無負於國家立學之意有司修學之心哉若乃曠安宅舍正路圯基頽垣倚聖賢之門戶以為奸是學校之為葺葺也則是朝廷立之而為士者傾之有司修之而為士者毀之亦獨何心哉應天為首善之地豪傑俊偉後先相望其文采之炳蔚才藝甲科之盛多乃其所素餘有不屑於言者故吾因新學之舉嘉多師多士欣然有維新之志而將進之以聖賢之學也於是乎書

又於嘉靖十年制增啟聖祠敬一亭貯六箴碑各

縣如之萬歷中重修

附

焦竑記

應天府學在治之東南腋山襟淮據

都會之勝宋景祐中置也國朝高皇帝定鼎金陵嘗就其處爲國學迨國學建詔爲府學如故自此名卿材大夫踵相接於朝彬彬稱極盛矣頃萬歷丁亥濟南周公繼以巡撫至恐學漸墮弛士人能達舉廟學而一新之他有樓有亭有橋又公所創爲去今十餘載耳而圯壞居半歲己亥諸生朱萬選童廷觀言於大京兆熊公張公徐公疑者以物大務叢未暇皇庠序事也亡何京兆公謁聖於學謂此有弗飭無以稱明天子勸學典禮建首善自京師之意乃按行隱度鳩工庀材命典史喻蔡王汝寵董其役而耆民徐文模又捐貲力偕兩生者贊成之費稟於官役不病民閱九月而訖功木甃黜至嚴而不華重門繚垣殿堂庖廩若經書祭器之藏若師生之舍皆爽塏壯雅冠於一時縉紳學

士奔走踴躍薦獻如禮弦誦大興京兆公喟然歎士之可與學也謂余爲郡人使爲之記夫聖人之道性自有之然必馴擾磨揉從容遲久至於禮讓興行風俗醇美而後爲學之成明興豈弟作人者垂二百餘年尊尊親親四海嚮風雖曰夫野老猶知自奮於隴畝之中而况遊儒學之館被菁莪之化者乎又况身際乎日月首耀於光明如留都者乎古無暇論即近出斯學者如楊刑侍倪太宰以器識稱梁端肅周襄敏以政事顯丁中丞景宮允以馴行倡顧司寇陳翰講劉清惠以文學著夫夫也本瓌琦博大之材豎光明俊偉之業巍行尊伐鬱乎不刊雖權倖當朝翠華遠指時事非矣張文倍何尚實輩不難以九死殉之猶能令姦人此類回面竦然而不敢動人徒謂山川炳靈忠孝世美而孰知上之功德涵煦成就如此之深也多士幸生於斯范型在望而京兆公復篤意教事砥前人

有加焉多士尚益力於學與日者登歲廊都鄉相
庶幾為時之偉人有如不試猶當死疆名節鼓舞
震動有以自列於後冀無愧於鄉先哲與京兆公
之意斯於所稱都人士者為不負也已夫本主上
之德與賢師帥之教皆為史者之任故不敢不書
以示後之人而又使之知事之所以始也熊公名
某江西南昌人張公名某淮安海州人徐公名某
蘇州吳縣人時張以遷秩行而徐公實克終之法
得備

書

國朝順治九年總督馬國柱題以明國子監改為江
寧府學重修聖殿旁設兩廡前立櫺星門戟門
後改藝倫堂為明倫堂堂旁設志道據德依仁游

藝四齋以官署為啓聖祠以國子監坊為江寧府
學坊其後祠廡漸敝康熙五年總督郎廷佐布政
司金鉉督糧道口口口知府陳開虞重修十九年
知府陳龍巖重修兩廡七十二楹二十一年總督
于成龍倡修同知朱雯署府篆捐俸修整四碑亭
及兩廡門欄二十二年知府于成龍教授謝允掄
訓導鄒延杞開濬泮池築屏牆四十五年織造使
曹寅五十五年布政使張聖佐相繼修葺雍正十

三年總督趙弘恩重修

附趙弘恩記

江寧府學前明國子監也

我

朝定鼎之九年以督臣馬公國柱請即其地改建府學
嗣順治十三年康熙二年三十四年重修規制恢
麗魏煥肅穆枕湖帶溪鍾阜雞鳴左右拱峙以江
南為人文淵藪江寧尤為重地而學宮之形勝氣
象半與之稱士之瞻仰弦誦其地者誠倍足以作

命總督

其向化興行之志矣余奉
兩江駐節江寧恭謁夫子廟庭見楹桓懷摘庭宇

門楯以歲久不治頽側剝蝕而有司沿習具文互
遵蓋蓋尊壘之不古法舞蹈聲容之不中節均非
所以尊聖人而致誠敬也乃檄行鹽驛道孔副使
虔往東山聘請學者修飭祭器樂器遵古以製惟
度惟具致工曲阜選士肄樂越五旬儀物既備乃
治廟宇庠者崇之敬者立之葺罅整陋施丹布采

越三月榮光昭煥視昔若加計費二千五百兩有奇皆出自余未敢募諸他人也仲秋之丁將修釋奠之禮乃為文以勸之麗牲之碑夫

國家設學教士所以毓人才以致治也嘗考自古人才以鄒魯齊晉河洛之間為盛迨晉南渡衣冠望族盡遷江左人文之盛始萃於金陵而散布三吳從此風氣日開家禮樂而戶詩書其文章道誼功名節行之美與夫替組軒冕之富常甲於天下豈惟山川之所鍾孕者秀而永亦濡染之所及月異而歲不同也然俗之陋者漸有以聞其先風之盛者漸有以振其後我

朝文治誕敷荒裔陬溼咸建學置師以致邊遠僻左之地皆有鄒魯之風是陋者既日以聞則盛者宜日以振而後可致其盛於日上之勢而不慮其衰今日士生斯土而求所以振之之道亦惟深體乎國家立學之意而副之以實而已夫學以聖人為師

聖人之道精粗本末無所不該讀其書以求其道則又甚易而簡事不越於君臣父子夫婦兄弟朋友之交功不踰於學問思辨時不離於飲食居處其要不外於忠信篤敬其說則具於詩書易禮春秋其易且簡如此然由之則上為聖賢次亦不失為寡過之君子而畔之者則目為禽獸其嚴又如此以是立學以為教固足以淑天下之士而為治化之本故自宋元明以迄我

朝因其制而加謹焉設科取士舉一代名器之重惟遊於學者是昇誠以能讀聖人之書必能為聖人之道也然則士之遊其宮者固將躬行篤踐以為身學深求心得黜識默存以為心學而後無負於立學之意苟徒事佔畢誦讀摭文綴華以為邀時弋名之具則

國家亦安所賴焉班史志吳稱漢興王兄子於吳招致天下娛遊子弟杖乘鄒陽嚴夫子之徒興於文

景之際淮南王招賓客著書而吳有嚴助朱買臣
賈顯漢朝文辭並發其失巧而少信雖其言尚矣
抑亦吳地之大略也金陵自孫吳建都後六代遞
壇祖尚清言王謝風流士有餘慕至明祖開國於
此遂為留都南徐政簡務閑率以詩文觴詠歌舞
為娛樂宜蓋與馬都雅相矜尚其知名之士樹壇
坵角門戶馳騁靡華而勉實行明祚之移識者猶
咎之今百餘年來其餘習猶有存焉者乎是今日
茲郡之士風急宜振起者良惟身學心學之是務
讀夫子之書即實求夫子之道師顏曾以師夫子
依其易簡而凜其嚴使其學明體達用實足以任
名器之重而佐治化之隆方不負

聖天子

勸勤訓士之至意將人才之盛邁於曩昔豈僅故
乘鄒陽嚴助之徒之足較勝乎哉余於斯廟之幸
新而有厚望焉用書以告之多士是役也經畫量
度度滿將事則安殿布政使司李蘭督糧道王恕

鹽驛道孔傳煥而董其役者則江寧府知府張粵年理事同知巴都善也

社學各府州縣皆同

文廟崇祀孔子以四配十哲並朱子配享以先賢遠
瑗以下七十八人先儒公羊高以下四十五人從

祀

各縣
學同

崇聖祠崇祀孔子五代配祀先賢顏無繇及孟孫氏
四人從祀先儒周輔成及朱松五人 名宦祠

鄉賢祠

各縣
學同

上元縣儒學舊在縣治東宋景定二年知縣龔蜚英創建元至元中縣尹田賢重修明洪武初省生儒併於府學弘治三年府尹秦崇於河干增置石隄障秦淮水嘉靖二年都御史陳鳳梧平學後高阜建尊經閣

國朝順治六年以舊國子監改府學遂以府學為上江兩縣學其規模俱從府學制康熙五十四年布政司張聖佐重修尊經閣五十八年江蘇按察使李

馥重修

文廟建青雲樓雍正十二年教諭章玉樹重修

江寧縣儒學舊在縣治北宋景定四年知縣王鏜
建元因之明初省生儒併於府學

國朝順治六年與上元縣同以府學為縣學

句容縣儒學在縣治南唐開元十一年始建於縣
署東宋皇祐間知縣方俊再建元豐二年葉表以
縣南驛改造即今地紹興二十三年龔濤修元至

大二年縣尹趙靖重建明洪武十二年知縣韓思
孝修殿廡置齋室十五年知縣韓宗器修明德堂
永樂十五年知縣周庸節重建戟門景泰間東廡
災知縣浦洪新之成化十四年知縣徐廣重建

大成殿嘉靖四十五年署縣推官張夢斗移廟廡前
數十步建明倫堂尊經閣于後

國朝順治十三年知縣葛翊宸修雍正四年知縣施廷
瓚重修并修兩廡及各祠

溧水縣儒學在大西門內唐武德間建

宣聖廟于縣治東宋熙寧二年知縣關起遷於崇儒坊元陞為州學明復為縣學知縣鄧鑑高謙甫相繼修葺嘉靖十七年圯於水知縣陳光華徙于京兆館東謝廷蒞成之三十九年知縣曾震復即朝元觀基為今學周之屏成之萬曆二十八年知縣徐必道加葺

國朝順治十三年知縣閔派魯重修

高淳縣儒學在縣治東通賢門外明弘治六年建
至十二年規制始備正德七年災御史徐翼周鶴
重建萬厯中知縣董良遂丁日近重修知縣韓維
聰增建

國朝順治十三年知縣紀聖訓重修康熙三十八年知
縣游祿宜重修五十八年教諭鮑漣修葺雍正九
年署知縣朱鷺修建屏牆

江浦縣儒學在城東明洪武十年知縣劉進創于

浦子口城內二十五年徙縣遂遷今地宣德初修
景泰中知縣勞鉞重建嘉靖中張峯侯國治改建
其後王守正李維樾相繼修葺

國朝康熙元年教諭汪湛斯重修二十三年教諭秦松
華訓導張士猷重修雍正四年知縣項維正教諭
朱廷策訓導王裔重修

六合縣儒學在縣治西自唐至宋屢經遷徙明洪
武五年知縣陸梅創立正統間史思古黃淵成化

後唐詔萬廷程董邦政相繼修理舊西向

國朝康熙六年知縣顧高嘉增修改南向三十四年知縣吳仲光移建於小東門外面淞河監生汪宇等捐助成之五十二年知縣魏世泰修正殿文昌閣奎壁樓雍正四年知縣萬世良陞高大殿建兩坊於櫺星門外

蘇州府

蘇州府儒學在府治南宋景祐元年范仲淹奏建

以胡瑗主教事建炎兵燬紹興後以漸修復元大德初治中王都中撤而新之明洪武初知府魏觀即舊址建明倫堂闢地又新之宣德間知府況鐘重建

大成殿又建至善毓賢堂於後附以四齋兩廊學舍前有范公手植古檜後有尊經閣天順間知府姚堂構道山亭成化四年知府賈奭創立遊息所十年知府邱霽改作

先師廟門廡橋池悉備正德元年建東西二門曰躍
龍曰翔鳳嘉靖十年制增啓聖祠建敬一亭貯六
箴碑各州縣如之隆慶萬厯間先後修葺崇禎六
年颶風作廟署祠宇橋木墻垣一時傾毀巡按祁
彪佳巡撫張國維推官倪長玗累年增修

國朝順治十二年巡撫張中元率屬修葺康熙二年巡
撫韓世琦布政司佟彭年七年巡撫馬祐十六年
巡撫慕天顏相繼修治二十一年巡撫余國柱布

政司丁思孔蘇松常道祖澤深捐貲大修

聖殿宏麗改觀二十四年巡撫湯斌重修

附

湯斌記

國家興治化在正人心正人心在崇經術漢儒專門名家師說相承當詩書煨燼之餘猶存什一於千百其時選舉不以詞章通經學古之士皆得上聞朝廷定大議斷大疑博士據經以對故士大夫勇於自立無苟簡之心孝弟廉讓之行更盛衰而不愛比重經術之效也宋濂洛關閩諸大儒出闡天人性道之源流故天下知性不外乎仁義禮智道不外乎人倫日用所謂得六經之精微繼孔孟之絕學宋史道學儒林蓋為二傳蓋以周程張朱繼往開來師友淵源不可與諸儒等耳而道學經學自此分矣夫所謂道學者六經四書之旨體驗於心躬行而有得之謂也非經書之外更有不傳

之道學也故雖經書而言道此異端之所謂道也
外身心而言經此俗儒之所謂經也宗洙泗而禩
洛閩人心之所以正也學者必先明義利之辨謹
誠偽之關則富貴貧賤之非道不處不去必剴然
也造次顛沛生死禍福之間不可移易者必確然
也母為枉尺直尋之事母作撓徑苟得之謀寧拙
毋巧寧樸毋華寧方毋圓戒懼慎獨之功無時可
間子臣弟友之職不敢不勉不愧於大廷亦不愧
於屋漏如此則發為議論自能息邪距詖而鄉愿
揚墨之教不得騁也出為政事自能尊王黜霸而
管商申韓之政不能施也其斯為真經學其斯為
真道學也已否則剽竊浮華苟為譁世取寵之具
講論踐履析為二事即
誦說先儒亦何賴乎

雍正九年巡撫尹繼善又

重修 正殿及明倫堂

文廟崇祀孔子

各縣學同

附

鄂爾泰丁祭木榜

為恭逢丁祭大典嚴

飭各屬官司宜備物以告虔須先期而齋宿事竊以至聖先師萬世之師表也冠帶集園橋

天子有臨雍之典春秋屆仲月上丁修釋菜之儀內則命夫胄子三公外則寄於有司屏牧典恭嚴矣誰敢懈焉本司寄任屏藩職司典守前當春祀親齋沐而宿賢官先令儒官校簿書而正祭器乃知牲或已經宰殺既失告全致潔之心物豈盡屬肥鮮更乖博碩著滋之義且或常供不充夫類數任先後以那移珍品不給於豆籩致鹽道之雙墨兼聞各學亦有同風罔知共竭精誠但解奉行故事甚或尊墨未備疇詳儀象之形琴瑟雖陳莫辨致荒之狀觀者如牆如堵任彼吃喙祭者似醉似喪類然聾聵一尊綆薦滿庭之燎火無光三獻未終兩廡之燈輝已滅於是甄劍與蓋簋悉憑顛倒几筵鹿兔共榛芟似遇摩空鷓雀分

甘奪臘半由承祭之家人拍地喧天違問糾儀之齋
長廩增附學諸生怒髮衝冠與隸膳夫一片雄心染
指凡此之類罪豈勝誅皆由約束之不嚴亦以躬行
之未善不思主鬯則身膺一命幸得窺聖人門牆分
獻則職任半墮原以司泮宮俎豆平時未知化導已
蒙尸位之譏臨事不克恪恭難免曠官之咎為此飭
郡守州牧縣令等職亦以誠教授學正諭導諸員嗣
後各精乃心以襄大典預期三日牲牲皆供乎儉
先
事一朝品物盡陳於類壁齋戒沐浴來觀習樂試歌舞
於明倫堂前料量潔清退服寢衣斂精神於尊經閣
畔庶幾必誠必敬斯夙夜之惟寅無怠無愆知神人
之咸格是并申之條約用以頒諸學宮如左

一既奉

肇聖五王神位不唯簋簋遵豆照數增設即牲牲亦應
各增其四有議共牲者其說不可從考之典禮惟配
享有可以共牲者專主無共牲之禮書云文王駢牛

一武王騂牛一其明微也自三代至漢唐皆不聞有共牲之說唐時祀五方帝且別以五色犢其異牲可知惟後漢有青帝赤帝共一犢白帝黑帝共一犢者祀之共犢非古也唐開元時五品以上室異牲六品以下共牲豈有王爵而可共牲者乎其各照數增一為五可也一祭牲祭品皆有定額一品一邊罔可缺遺况牲取親割以告虔也取其血毛以告全也可既宰而入學門乎豕曰剛鬣註謂其豕肥則鬣剛羊曰柔毛註謂其羊肥則毛細而柔弱此博碩肥腍之所由稱也可以瘦瘠不堪之羊豕而飲之灌之以充牲體乎既宰且不可瘦瘠且不可况可闕其頸數而以肥吏胥之囊索乎月令曰犧牲無用牝又曰命宰祝循行犧牲視全具按芻豢膳肥瘠察物色必比類量小大視長短皆中度五者備當上帝其饗註曰上帝且設饗之况羣神乎嗣後各官俱須先三日親至學視牲牲如法然後稽其數使人牧之以待先一夕親割吏雖奸

其何所施乎

一各學祭器樂器俱照闕里志修理整齊不得因陋就簡除已完備者無論外其未完備者該學教官考據圖式移送有司設法捐備如有司推諉不肯捐備者許該教官據實申詳以憑定奪如有司新置完整亦許該教官詳明以憑嘉獎庶知其留心正務也

一丁祭先數日集樂舞生演習精熟先一日與祭官員親同往看不得草率從事

一丁祭先一夕凡與祭官齋宿學宮不得有一員私宿本署

一丁祭之日庭燎燈燭務須光明如晝俟祭畢後已除神前燈燭之外官員不得各自張燈

一丁祭之日樞星門內不得容一閑雜人所有事宜止許學者幹辦及小心謹慎門斗二人多則四人照應燈燭其官員僕從人等一票於門外伺候萬無許僕從人持燈夾墊相隨上殿及上兩廡之禮君師一

體幸勿自取罪戾以貽失禮之愆也

一丁祭之日既不許容一闕雜人自無有搶奪祭燭及祭品之人倘或仍有潛匿門內乘空搶奪者以盜賊論即時擒獲解司以憑盡法重究

一學宮之地聖賢靈爽所依不唯丁祭宜修治肅清即平時亦宜灑掃潔淨近見黌宮以內栽瓜種菜學圃成澆灌之場曝被晒衣諸生絕往來之路甚至丹楹刻桷徒供蝙蝠棲遲烏革鞏飛盡是魑魍巢穴蛛塵百斛廟貌埋埃垢之中魍魎千箕腥穢聞宮牆之外皆已安之若素久且視為當然甚至先儒先賢兩廡之神牌倒置鄉賢名宦兩祠之神位傾頽非其子孫有誰咨問加之朽蠹若罔聞知凡爾學官所司何職諸門役等多亦奚為嗣後教官不時巡察務令門斗分班輪值逐日掃除學宮之內總不容有一毫塵垢庶無忝厥職也慎哉毋忽

崇聖祠

名宦祠

各縣學同

附

明陸祭名宦祠議

謹按蘇郡

學名宦祠所祀古今監司守倅通若干人而其間有不係於蘇者蓋六人焉王魏公旦富韓公弼歐陽克公修蘇端明軾陸文安九淵李文靖侗皆賢者也而得祀於蘇則知禮者疑之夫祀國之大事也將昭勲德勸忠孝示愛敬以為民質也不可不謹聞諸古曰鬼神不歆非類又曰非其鬼而祭之諂也諸君子未嘗涖官茲土雖聲實顯著而惠之流於蘇也不專其祀之也越於禮矣或曰諸君子之言行功伐合於祭義所謂以勞定國法施於民者將天下得祀而何有於蘇祭以為非也在禮惟天子有天下其祀無所不通諸有國者山川百神之祭皆不出境衛成公欲祀相甯俞曰相之不饗於此久矣不可以閔成王周公之命祀楚昭王有疾卜曰河為祟大夫請祭諸郊王曰三代命祀祭

不越望江漢睢漳楚之望也河非所獲罪也皆不
果祀今之祀者郡守丞實從事焉郡守丞秩不過
古諸侯諸侯之祀不敢踰國而郡守丞得祀他境
之賢以為禮也亦有據乎今之制惟孔子為師儒
宗得天下通祀自餘若皋陶伊尹伯夷太公之倫
猶不得與孔子比其祀皆不出於其鄉與其所封
之上禮之節也諸君子微有孔子之聖雖賢亦不
能當皋陶伊尹伯夷太公而祀非其地也越於禮
矣原其始所以得祀不可知殆邦人之好賢以是
寓其愛敬或其門人子弟有官於蘇者以其私附
焉而後人遂襲之與知禮者亦改而正之可矣或
曰諸君子之祀列於學宮邦人習聞之三百年矣
誠一日撤焉將駭民聽而傷忠厚之道夫與其過
而去之也寧過而存之乎蘇又以為非也夫非禮
之禮君子有弗貴者焉孔子曰曾謂泰山不如林
敬乎以死者為無知又馬用祭以為有知夫亦怛

悞而莫之顧也君子愛人以德細人愛人以姑息
今為非禮之禮以濟賢者又拂先王之經而踰當
代之制非小過也不亟正焉而襲細人之姑息以
為忠厚亦陋矣又蘇自漢以來監司守倖賢而不
得祀者尚多謂宜擇其人進之而罷諸所不當祀
者於誼為允且使斯民知禮之嚴若是雖賢者不
得僭冒庶幾禁淫祠黜匪類
以示風教之本也由茲祠始

鄉賢祠

各縣
學同

吳縣儒學舊在縣治東南宋景祐時始立紹定初
改建於府西賓興坊元至正十九年平江路總管
周仁縣尹張經始琢石為門附鄭元祐儒學門銘

天下郡縣學莫盛於宋然其始亦由於中吳蓋范文正公以宅建學延胡安定為師文教自此興焉若吳縣學按李宗諤圖經云文宣王廟在縣廡東南今三皇廟故縣治也銘定初知縣趙善瀚始建學於榔城西南之賓興坊去姑蘇驛不百步其廢置遷易概可攷矣宋以杭為行都中吳乃三輔地縣學宜大於隣邑然負城西隅於地勢蓋甚迫窄更宋迄今累加完葺至正十九年平江路總管周仁縣尹張經皆以興學為己任覩學外門日就廢壞乃始琢石為堦與楹上象日月堅緻聳峭翼以垣牆瑰麗弘敞稱其為子男學官之門攝學事虛熊及學之人士咸謂縣之有學久矣未有以石為門者非二侯致力興學不及是也遂為之銘曰吳邑有學由宋始完宋社既墟學官則存維學有門幸嚴啓閑因陋就簡蓋已歷世郡守周侯近古遺愛張令佐侯民所共戴琢石堦楹作學之門石

質如玉孚尹潤溫木易蠹朽石堅斯久何莫由是
以啓其節勒銘於茲宜特識言來遊來歌永夫弗

護
明洪武五年知府魏觀重修宣德九年巡撫周

忱知府况鍾徙建縣治東南為屋二百三十餘楹

成化八年知縣雍泰重建櫺星門弘治十年知縣

鄺璠加闢焉嘉靖二年知縣楊叔器作講堂西齋

號舍經閣跨街建會解兩坊工未竟五年知縣蘇

祐成之崇禎間知縣陳文瑞牛若麟先後重葺

國朝順治十一年詔天下修學督學石申教諭夏鼎倡

修十七年諸生施學先等捐修敬一亭葺興賢佈
聖兩坊康熙六年布政佟彭年捐資修葺二十四
年巡撫湯斌建尊經閣四十年巡撫宋犛飭攝縣
事李宏重修雍正九年巡撫尹繼善捐俸修理飭
縣令吳棟按察司經歷陸廷樞董其事殿廡墻垣
煥然一新

長洲縣儒學宋景定間始立在府城東北後毀元
至正中縣長元童與郡人陸德源創建之明洪武

七年知縣宋敏文張翔修葺成化九年知府邱霽
乃擴地東南改建焉正德中提學張鰲盡以廣化
寺地歸學嘉靖十八年巡按舒汀以教諭蕭文佐
議學地湫隘謀遷之遂改城東福寧寺以為學宮
創立悉如制萬曆十七年巡按李堯民重修規模
畢備二十五年知縣江盈科建文星閣

國朝順治十一年督學石申修葺未竣康熙間訓導王

玠教諭姚文焱先後竟其工

附

丁思孔記

古先王
敷教以

治天下自黨庠術序無非學校而其教之之人即一鄉之賢士大夫習知其土俗性情因以簡其帥與不帥者而興之屏之則人之淑慝咸相見而無所容其欺偽矯飾之情所以事勸而業成凡屬智能勇功之士克為國家建大猷肩大任者亦無不出於其中故自禪讓以還何代不以武功定天下及統緒甫集未有不汲汲於數飭文教以為永安長治之基者誠以其效雖緩而功可久也迨行之寔遠儒學與吏治既分兩途一切理民經國皆以為不必出於鄉三物之中而唯智能勇功之是驚舉凡古初厲世磨鈍之具率視為迂闊無當之虛文相與掉臂而去之設有司其職者總總焉惟德教是憂反衆起而嗤訕之其人苟非篤信而強力者亦且靡然置之而不敢復道於以求人心之敦茂而道德之凝承也不綦難乎於此有人焉不顧時俗之浮言毅然立教以為已任舉廢起衰以行

之斯亦人之所難能矣夫善教者猶醫也攻疾在
瞭眩之際則主在標養疾於平緩之日則探其本
若是者良醫也不問緩急惟其疾之所至旋轉以
相逐則亦庸醫而已矣今謀治而必審其端於教
是蓋能探其本者也吾所謂效雖緩而功可久也
且古今治法固有相沿未變者矣古者鄉治其鄉
國治其國無所嫌於私暱也後世防檢益嚴土著
者不得仕於其鄉甚且立為三五之法而惟銓補
學官許不避其本籍是猶教之鄉而用其習知土
俗性情之遺意也然因其土俗導其性情又有不
可同日而論者今自大江以南若姑蘇固吳越之
一大都會也承要離伍胥之流風而文以延陵季
子辭讓之節其於慷慨憤烈之事或至滅頂剝膚
而不暇惜豈非明於憂患而獨立不懼者哉然而
敝化奢麗之虞抑已久矣司是教者就所長以正
之因其敝而革之要厥觀庠必自學校始矣嘗考

志乘在郡之儒學三長洲學宮建置獨後創於宋之景德再立於元至正間而改設於明之嘉靖歷年滋多傾圮是惠訓導王君受事典學喟焉歎興捐貲以謀完葺度材庀工未幾而棟宇克新垣墉盡繕其所謂毅然已任者歟或猶謂立教之本在於人心學宮之建猶外飾也抑知社稷宗廟之中不施敬於民而民敬良以瞻仰游息為觀感之所由興苟使儀容器物必淪委於秋飈榛莽之域又何從端立教之本乎思孔不敏司會是邦慄慄焉惟教養無術之是懼王君修學歲而鄉先生暨學之諸弟子員咸造余而請為之記且曰礪石以頌久矣余嘉王君之志與余之見固有合也今幸逢天子緝熙遊敏鸞意揆文凡中外明揚之典必察其有無興行教化以為考課之殿最斯東吳人士將由茲學之振興知所以導民成俗其本必在乎是於以繁隆夫比閭黨族之化其亦將有合矣夫王君

名玠安慶之桐城人康熙四十三年郡紳顧沂等修理萬代

宗師坊彭定求捐造三樂堂於明倫堂後雍正四年長洲縣分置元和縣以教諭專理長洲學事五年知縣江之焯修

正殿九年巡撫尹繼善捐貲重修

元和縣儒學與長洲共學以長洲訓導理元和學事

崑山縣儒學初在縣治東宋元祐間知縣杜采遷

於西南即今地明洪武初改修宣德元年知縣羅
永年教諭曹昇加葺景泰間知縣吳昭改建

大成殿弘治五年知縣楊子器復新之

國朝順治十五年提學張能麟捐俸倡修康熙九年知
縣董正位教諭吳謚復加修葺至十一年工成雍
正四年崑山縣分置新陽縣以教諭專理崑山學
事雍正十年邑紳士募修 正殿戟門十三年新
邑顧登捐修尊經閣

新陽縣儒學與崑山共學以崑學訓導理新陽學

事

常熟縣儒學在縣治東南前臨運河宋淳熙十年

曾蔡始建端平中邑令王燦改建附魏了翁重建

大成殿記

常熟縣學之始圖乘放失僅有梁書至和紀年餘無所考慶元三年縣令孫應時以

言游里人也始祠於學新安朱子既為證其事實慶元年祠遷於學之左而孔堂闕壞弗不加治今令會稽王燦始至大懼無以崇化善俗約縮浮窳踰年更而正之屬邑士胡洽胡淳庀其役以孔廟居左廟之南為大門北為言游之祠又東北為本朝周子張子二程子朱文公張宣公祠以明倫堂

居右東西為齋廬四以館士為塾二東以儲書凡
祭器祭服藏焉西以居言氏之裔通為屋一百有
二十楹而為垣以周之且增田四百畝有奇歲助
公養之費凡言氏之裔官為衣食而延師以教之
別為田五百畝以給其費白於郡於部使者為廩
以貯之經始於端平二年冬竣事於明年之秋迺
八月丁亥釋奠於新宮屬郡人葉輔之叙其役以
求記於了翁竊惟朱子嘗記子游之祠矣如魯論
所載二三事皆發揮無餘藐茲孤陋安敢復措一
詞然嘗讀禮書而竊有見焉因記廟學之成並附
其說夫檀弓不知何人所作而一篇之中獨於子
游極其稱譽雖於孔門諸子率多譏評又以言曾
並列其是言而非曾者非一幾若偏於抑揚然即
其書考之大抵當典禮訛闕無所考訂之時人之
有疑弗決者以質諸子游故前後典禮所闕者十
有四皆以言游一言為可否亦足以見其為時人

之耳目雖法哉叔氏之一語若譏之而實尊之然則子游以習禮列於文學蓋三代典章之遺賴游以有存者嗚呼信為豪傑之士矣昔柳宗元謂論語所載弟子必以字惟曾子有子不字遂謂是書出於曾門蓋字與子皆得兼稱如門人之於孔子進而稱子不敢字退而言仲尼不言子其次亦有此子且字如閔子騫等不一二人或子或字者又數人然淵弓至游夏最號高弟字而不能子也有子曾子子而不得字也就二者而論則字為尊故孝經字仲尼而子曾子禮運字仲尼而名言偃至於子思字其祖孟子字其師之祖相傳至今之人字仲尼者無敢以為疑仲尼作春秋二百四十二年間字而不名者僅十有二人而游夏諸子之門人亦各字所師相承至於漢初猶未敢輕以字許之即是而觀則子游以句吳孤遠之士遂得字而不子以列於高弟之目此又豈易易然者今吳門

密通行都而常熟為壯邑有如游之北學洙泗遂以習禮輩行顏閔寥寥千載間豈終無其人耶或者狃於習俗未有以自振我朱子既嘗表其事以風厲之子又何言獨惟山川風氣古今猶夫人也誦先聖之書服先賢之訓嗚呼其必有聞風興起以母負建學尊賢之意者士其勉之 元皇

慶中邑人楊伯麟修明因之而加闢焉宣德九年知縣郭南修兩廡學門正統二年知府況鐘修兩齋六年縣丞陳澄建尊經閣成化二年知縣甘澤修廟學弘治八年巡按劉廷瓚重修萬曆三十七年知縣楊連重修

國朝順治十二年提學張能麟葺

文廟康熙六年同知魯超重建尊經閣

附

魯超碑銘

聖人以六經教人而學者往往得其性之所近要其指歸期於相通而已自漢以還諸儒各守其師說黨同伐異舐括萬端其後始定為大經兼經之法以取士由明迄今專用一經而已然竊以為取士不必其求備而教人則欲其兼通末世功名之士龜勉章句以希弋獲視二經以外辟如侏儻語言之不相通而方圓鑿枘之不相入此講誦不事而詩書故棄之所由來矣常熟縣學之有尊經閣始於明正統時教諭趙永言而署縣事陳澄成之其後再修於萬厯間迨今幾六十餘年矣棟樑斲折蓋瓦穿漏編簡之僅存者鼠啗而蟲蠹登覽者慨然余以采風校士每過其地則思捐俸葺理之

會右藩佟公諱彭年大參盧公諱絃安公諱世昂
暨郡守吳公諱道煌督糧吳公諱江偉司李龔公
諱在升邑令李君璞咸樂為仗助於是鳩材聚工
經始於丙午之春董其役者為學博士沈君汝蘭
凡閱月而告成從衆志也既成余徘徊瞻顧而歎
曰常熟小邑也而得為南國人文風氣之首者豈
非子游氏為之先耶子游文學之科也而其言學
道則愛人易使則夫聖人之教果有外於道以為
學而凡詩書禮樂之文果不足以盡道歟今郡縣
學有明倫堂與尊經閣並建禮也孟子謂經正則
庶民興而推揚墨之害至於無父無君然則所謂
道者豈有外於君臣父子夫婦兄弟朋友相接之
間而所謂經者非即親義序別信之燦然者歟我
世祖皇帝有見於此特命儒臣纂修經訓

詔天下貢院皆得以孝經試士
皇上繼之稽古右文崇尚實學天下嚮風而余所見郡縣

浮屠珠宮紺宇以藏其所謂梵書唄字者至吾堯舜禹湯文武周公孔子之書雖學士大夫家猶不知所以尊禮之者何其重於彼而輕於此也蓋玩其文不察其義習其言不體諸身是雖日取聖人之書而尊禮之無益也於戲道之不行也自經學之不明始矣余承乏斯土以備防為事非有教化之責於躬幸承

天子仁聖德威遐暢海波不揚以與二三子講道問業於此詩不云乎至於海邦莫不率從又曰矯矯虎臣在泮獻馘夫余之此舉亦猶行古之道也夫碑而銘曰於皇

聖世懿德孔昭六經黼黻五典瑛瑤猗惟周行淑我譽髦矧伊海隅先哲之里奕奕三吳悠悠千祀炳如蔚如是弘是啓縹囊緗帙聖則寤焉安絃舞薦道則傳馬庇之無所曷永曷宣相彼二氏雕甍刻宇慧藏霄承琅函玉貯宜伊典墳置儕梵侶尊經有制

先民所營爰即故址以善其仍橐鼓具舉東壁斯
明易占棟隆詩歌如跋雲起虞山風來琴水虎變
龍矚於馬狎起為麟為鳳為珪為璋本
諸孔孟騁乃羲皇翹我鴻祚名德無疆十八年知
縣林象祖重修雍正四年常熟縣分置昭文縣以
教諭專理常熟學事

昭文縣儒學與常熟共學以常熟訓導理昭文學
事

吳江縣儒學在縣治東南舊學在城西隅宋紹興
間燬於兵知縣石轍改創於垂虹橋南元至正十

二年達噲噶齊哈瑪爾氏拉爾錦命樂師選習廟

樂

附

許從宣大成樂記

按周制大胥春入學舍菜合舞秋頌樂合聲故凡釋

奠必有合也其登歌清廟下管象舞大武是也故月令仲春上丁命樂正習舞舍蓋學校禮樂所自出小有舍菜而以食為主大有釋奠而以飲為主其於學校習舞與聲大合六代之樂一也吾夫子以聖人享南面王爵歷代尊崇禮頌之綉情文之備至於今莫之能尚也唐貞觀間太宗以文治然其廟享聖人襲用齊典禮僅設軒架之樂六佾之舞而已繼後開元間釋奠始用宮懸之樂至於故宋崇儒右文可謂至矣然春秋上丁釋奠東序上戊釋奠西序雖登歌有部至其用樂不以軒懸而以判架兼不設舞位先儒謂有歌而無樂非古人習樂合舞之意也遂乞墜正以表尊崇至考唐之

儲君其釋奠於學鐘磬箕箒絲聲在絃匏笙並陳
祝嘏合止賁鼓間作樵麓和鳴具有成式禮將陳
協律郎俛伏舉麾則永和之樂作登歌則肅和之
樂奏雍穆紆和悅人心而娛神明者其為樂可謂
盛矣今天下路府州縣莫不有學其所以尊崇聖
人者冠衣服章殿寢階祀已純乎王者之禮矣若
夫廟樂八音蓋猶有取乎虞廷之韶箎豈不曰後
世雖有作者虞舜氏不可及矣吳江之為州也雖
於吳為南北津要然州治出乎江湖之上風濤之
所掀播魚龍之所出沒而州學迫里市之隘在垂
虹橋之南廟享聖人既有著令學宮與廟雖皆具
至於廟樂則尤缺焉至正十二年州達魯花赤哈
達里氏禮牙進公以奉議大夫來監是州既建戟
門以大廟制造命樂師選學之彥肄習廟樂甫及
期而樂大備自擬安典禮變成章與八音並奏而
無纖毫敢畧者廟樂於是告完人士之美者來遊

來歌觀廟樂以矢其音况當大比之年其為世用必矣若夫琴瑟在御笙歌聞奏且將見蛟龍鼉鼉海怪水獸與仰秣之馬出聽之魚咸感化於廟樂之盛者而况於人乎况於鬼神乎 明拓其地而新之景泰六年知縣賈亮重建

國朝順治九年至十三年知縣唐增吳就恒雷珽教諭洪天開相繼修葺康熙五年同知魯超推官龔在升知縣劉定國捐修雍正四年吳江縣分置震澤縣以教諭專理吳江學事知縣徐永祐重修殿廡震澤縣儒學與吳江共學以吳江訓導理震澤學

事

江南通志卷八十七

欽定四庫全書

江南通志卷八十八

學校志

學宮

二

松江府

松江府儒學即舊華亭縣學址在南門內宋元豐七年知縣陳謚始議興學邑人衛公佐公望獻縣之東南地建之紹興中學舍始備元至元十四年

縣陞為府縣學因為府學至正間燬於兵同知顧
逖重修明洪武間知府林慶創射圃於學後宣德
間知府黃子威作兩廡屬於講堂主事李賢祐建
觀德堂於射圃正統五年推官楊政建尊經閣提
學御史彭勗立四齋弘治中毀於颶風知府劉璟
重修正德間復壞知府陳威喻時先後修治殿堂
廡閣四齋以及祠園門廡坊橋之屬皆如舊焉嘉
靖十年制增啓聖祠建敬一亭貯六箴碑各縣如

之萬歷間知府詹思虞崇禎間知府方岳貢增修
國朝順治十一年知府李正華重修明倫堂十六年教
授周建鼎重修

先師廟康熙二年知府郭廷弼重修戟門二十二年
知府魯超重建啓聖祠雍正十年知府吳節民修
葺

正殿

崇聖祠

名宦祠

鄉賢祠

名縣
學同

華亭縣儒學始建於宋元祐中在今府學後玉帶河之陽端平間遷於河南及元改華亭府學復建縣學於舊址後燬於兵明洪武三年知縣馮榮奉詔立學始以邑人徐進義塾地構之在今府治西南後知縣周朗祝子憲相繼增飾永樂間壞於風雨知縣高宮重修正統成化間知縣李希容戴冕先後修葺嘉靖後知縣聶豹賈待問項應祥徐尚勲鄭友元歷年增修

國朝順治十二年教諭王道光修

文廟明倫堂門廡康熙十九年知府魯超捐俸重修
郡紳施維翰助貲三百兩教諭路序項亮臣董其
事雍正四年縣分置奉賢縣以教諭專理華亭縣
學事十年知府王喬林復修 正殿明倫堂

奉賢縣儒學與華亭共學以華亭訓導理奉賢學
事

婁縣儒學

國朝順治十三年割華亭西界為婁縣因設學官而學宮未建也明年提學張能麟議建學宮使訓導馮瑄擇基址未就至今與華亭共學雍正四年婁縣分置金山縣以教諭專理婁縣學事

金山縣儒學以金山衛學為之明正統四年工部侍郎周忱奏立衛學於衛東北隅御史劉福嚴塗劉魁孟俊相繼增修弘治十一年指揮翁熊重建大成殿兩廡戟門飾聖賢像十七年都指揮王憲製

祭器萬厯二十一年知府柳希點教授翁興賢重建

國朝順治十五年巡撫張中元同巡按李森先學道張能麟大修府學訓導黃中亨董其役金山衛學無官舊屬府學管理金山立縣遂改衛學為金山縣學仍以府學訓導理學事

上海縣儒學在縣治東南即上海鎮學也宋咸淳中監鎮董楷作古修堂為諸生講學之所元至元

中鎮陞為縣即為縣學明洪武中同知王文貞修
復學宮正統間御史彭昂蕭啓鄭顯相繼修葺萬
厯間知縣教選顏洪範呂濬先後增修規制大備
國朝順治十八年知縣涂贄教諭曹忱重修康熙十年
知縣朱光輝濬修宮牆泮水八十餘丈十九年知
縣任辰旦重修啓聖祠及

大成殿二十二年知縣史彩重鋪殿前月臺丹墀并
儀門兩廡五十六年邑紳吳銓修 正殿兩廡明

倫堂雍正四年分置南匯縣以教諭專理上海學事

南匯縣儒學在東門內雍正五年知縣欽璉建門牆堂殿書齋講堂畢備立泮池瞻杏二坊而記之

附

欽璉碑記

雲間之列縣者四縣各有學名公碩彥之山學而升者代不乏人才華經

濟為海內所推

聖天子御極之初念其地之賦役繁重視他郡倍蓰分縣為八而學亦隨之是南匯縣學之所由創也按南匯向為千戶所在上海之東南隅有城屹如置將領以守之兵民雖處罕黨塾術序之美及陞而為縣百度維新典常具備督學者羅其士而試之一

歲之閒補博士弟子員者若而人分儒官以任其事然樂鼓篋之典鄉飲大社之文當以次舉行而黷官闕如禮儀莫洽曷以蒸髦秀而樹之風聲連奉

簡命宰是縣不敢以興賢育才委為異人任經營籌度購民地若干畝於縣之東南境擇其址之爽壇者培之建

大成殿五楹旁列兩廡前設大門門以外為泮池施橋於上橋之前則櫺星門樹焉緣以崇垣百堵皆作即其後為崇聖之宮講堂齋舍計日告成丹雘炳煥階祀砥平宮牆之旁翦其荆榛易之以桃李松檜嘉樹有蔭壁沼連漪互相掩映山川秀靈之氣於是乎萃工既竣邑多士之繫籍於學者請建誌其事以垂不朽建惟敬敷五教之命昉自虞廷論秀書升之法載在周禮君國子民教學為先歷漢唐宋元明以來莫或廢至

昭代而文教倍隆自

聖祖仁皇帝涵熙樂育積六十年之久文思光被雲漢為

章暨

皇上嗣登寶位臨雍講藝闢橋門而觀聽者幾萬人文物

聲名之盛不冒乎海隅日出之鄉遐邇旣僻壤里巷

之儒罔不崇師考業以自淑矧為邑宰有宣化承

流之責而恣委鉅典於草莽乎夫

朝廷以經義取士操觚角藝之流國學生而外名必隸於

鄉校而後循序以登春秋之榜巍科顯仕胥從是

出是學固多士致身之所自始也繼自今願多士

益自淬厲朝夕奮勉經明行修挾其素所蓄積者

以彙征雲路對策大廷彬彬乎文章道德之盛接

踵代興前輝後耀足為邑之光華俾追念於創學

者之有微勞而與其榮施則建之所致望於多士

者豈淺哉學官以上海學訓導理南匯學事

青浦縣儒學在縣治南始於明萬厯元年知縣石
繼芳用顧氏義塾立學光祿寺署丞顧正心捐資
千金助之規制畧備二十四年久雨學宮壞知縣
卓鈿修葺

國朝順治六年知縣王嶙重修康熙二十年訓導陳堂
謀捐俸增修四十一年署縣事許鈺重修雍正三
年教諭蘇鍾嶺重修四年縣分置福泉縣以教諭
專理青浦學事

福泉縣儒學與青浦共學以青浦訓導理福泉學
事

常州府

常州府儒學在府治西隅南唐刺史李栖霞始建
學宋太平興國初郡守石雄徙建郡治西南景祐
三年詔許即廟立學賜田嘉祐間郡守陳襄增廣
之崇寧初郡守朱彥建狀元坊於學南紹興間郡
守俞瑛闢四館以居學者淳熙中郡守林祖洽建

御書樓藏高宗賜六經墨本德祐時燬於兵元至

元間重建

附

張伯淳記

皇帝踐祚之初制詔天下郡學完葺如法養士無田

者官給凡皆尊孔子之道德至渥也然則學官崇飾宜不在諸名山大川常祀之下常州故有學創於唐刺史李栖筠迨宋陳襄為守移置郡治西南地踞重河之會占金斗之勝毀於乙亥歲惟禮殿講堂巍然如魯靈光斯文有相如是夫二十年間葺未易完且廟與學混非所以肅觀瞻昭禮敬此固有志於道者所為歟然而未能遂也總管安豐呂侯師聖戾止當詔下之歲十二月祇若德意獨能視為先務以其狀白於廉訪副史王侯侯意同議合既得請於是審曲面勢計工度材修大成殿龕帳鼎新塑十哲像繪從祀建階序一改舊觀廟與學始各得所既又剪榛蕪增建四齋室先賢有

祠聽事有堂儲糧有廩闕兩廡而弘之凡創屋為
間者四十有三即其故而完葺者不與焉如鑄祭
器置書籍惟事事備先是學有田二十有六頃隸
宜興之從善鄉歲入米二千石有奇久為僧舍豪
家所奪求直有司十年不能決至是事撤中朝尋
報可侯之有功於學大矣而猶以為未也一日語
教授天台吳君宗彥曰殿有儀門冠帶所集推腐
將壓蓋更諸必崇必敬乃稽古式市大木作門五
間簷牙森聳輪奐肇飛學舍於是大備是役也經
營於侯下車之始落成於元貞二年十月公餘督
勵必躬凡費則搏學廩以給工樂趨事農不知役
郡文學不有其勞歸之太守太守不自有而歸工
部使者猗歟盛哉會伯淳謁告歸里文掾欽修建
本末願紀其實於戲井田廢而阡陌封建廢而郡
縣內刑廢而鞭笞銅冶廢而楮券猶可因時而行
所必不可廢者學校也學校而可廢則倫紀於何

明修齊治平之道於何而寄哉國家之所崇尚賢
侯之所欽承而加之意者豈特為矜佩遊談之地
哉矧毘陵為吳季子采邑禮讓遺化在人
心者未泯也伯淳不量荒陋書以遺之

明洪武

初以師生附武進學肄業五年知府孫用始建

大成殿戟門兩廡及明倫堂兩序并志道據德依仁

游藝四齋旁設射圃宣德間知府莫愚即射圃作

觀德堂成化五年知府卓天錫復建明倫堂增置

尊經閣於堂北嘉靖間制增啓聖祠建敬一亭貯

六箴碑各縣如之萬曆後知府劉廣生教諭汪會

海先後增修改建天下文明坊

國朝康熙元年教授郭士璟復加修葺二十四年知府
祖進朝重修

崇聖祠

名宦祠

鄉賢祠

各縣
學同

武進縣儒學在縣治東南宋咸淳初知府家鉉翁
即法濟圮寺改創宋末燬元附於郡學大歷間重
建明洪武五年知縣董尚拓舊基建禮殿講堂改
築橋星門南向成化間知縣熊紳建東西樓尊經

閻嘉靖後知縣馬汝璋茹宗舜晏文輝羅華袞相繼修理

國朝順治十四年邑人楊廷鑑等重修康熙八年教諭王琰重修二十三年知府祖進朝重修殿廡二十九年教諭崔學古捐貲續修雍正四年武進分置陽湖縣以教諭專理武進學事

陽湖縣儒學與武進共學以武進訓導理陽湖學事

無錫縣儒學在縣治南西水關內宋嘉祐間知縣張詵創建元初教諭虞薦發重建明洪武十八年知縣袁大興修建堂齋成化間同知謝廷桂盡撤舊學而新之

國朝康熙九年知縣吳興祚重塑聖像二十四年知府祖進朝重建

大成殿三十三年知府于琨修正殿兩廡戟門雍正四年無錫分置金匱縣以教諭專理無錫學事

附 明徐有貞無錫學先賢祠記

古者學宮之有事則釋奠於其國之

先師今學校之祀先賢盖由斯義以起禮也然而其祀事有興舉與否則繫乎其人錫山儒學之祠創自宋季中祀龜山先生文靖楊公中立而以玉泉先生宗丞喻公子才遂初先生文簡尤公延之小山先生肅簡李公元德實齋先生文忠蔣公良貴配歷元至國初而中廢至是同知郡事河中謝君時芳乃復興之使來請記其事夫文運之所在即天運之所在初二程之學乎周子也宋運方盛於北吾道亦從而北及楊氏之學乎程子也宋運將沮於南吾道亦從而南此其所闢係也大矣豈偶然哉自龜山傳之豫章羅氏豫章傳之延平李氏延平傳之考亭朱子考亭因是而集大成則斯道之有傳於今也實自龜山始揆其始雖天下之學祠焉可也獨錫山哉然中立寓錫山十有八年

之久是猶錫山之人也矧錫山之人之學道也亦自中立始喻氏來自南昌尤氏來自閩粵而並家錫山廷之學乎子才子才學乎中立所謂見而知之者李與蔣固皆錫山人也生喻尤之後而學則肩焉所謂聞而知之者其傳雖弗如考亭之盛而其入與學之正蓋無異焉若乃中立力斥安石熙豐更張之邪說子才力贊昂浚炎興恢復之正論廷之力陳道學之為是以釋孝宗之疑元德力辯汝愚之為忠以祛寧宗之蔽良貴力抑彌遠之惡而揚德秀了翁之善以啟理宗之明是皆有功於其國有功於吾道當時雖不能盡用其言然天下後世之公論不可沒也絲是而並祠于學又豈過哉

金匱縣儒學與無錫共學以無錫訓導理金匱學

事

江陰縣儒學在縣治西南即宋江陰軍學熙豐以前僅以廟祀

先聖學者肄業其中崇寧間大闢賢宇紹興五年知軍王棠更新之乾通紹定中知軍徐歲顏者仲相繼修葺元末燬於兵明初江陰侯吳良即舊址立學知縣吳志遠重修宣德間侍郎周忱重建

大成殿及兩廡戟門後知縣周斌黃傳劉紘岳凌霄

相繼修葺

國朝順治間提學石申張能麟修之康熙十三年知縣

何爾彬龔之怡教諭宗章竣重修二十六年知縣

陸次雲重修

附

明陳芝英江陰學鄉賢說

鄉有賢則祀之

非賢不祀也江邑祀鄉賢者前有延陵季子後有李忠毅繆文貞兩公而其賢也著矣而其祀也確矣故謂江邑之崇祀無訛無濫或觀於此而得之也先是宋蔣待制靜明孫司業作俱在祀典弘治中知縣黃博考論黜焉蔣以徽宗朝進瑞烏頌故孫以荅性難說微偏故論者謂以兩先生之賢而一青之不容如此則蘋蘩蕝藻之馨香洵非無德而能幾此也今世無黃侯耳有黃侯其存焉者寡

矣此歐陽郡公別有先賢祠之淑而
以為牛驥同槽祀之適以黷之也

宜興縣儒學在縣治西南舊在縣治東南宋景德

四年建皇祐初徙南興門外紹興五年增修

附朱

熹記

紹興五年十二月宜興縣新修學成明年知
縣事丞議郎括蒼高君商老以書來請記而

其學之師生迪功郎孫庭詢貢士邵機等數十人
又疏其事以來告曰吾邑之學久廢不治自今明
府之來即有意焉而縣貧不能遽給以其費乃稍
葺其所甚敝亟補其所甚闕且籍閒田五千畝以
豐其廩斥長橋佃金七十餘萬以附益之為置師
弟子員課試如法而又日往游焉躬為講說聞之
以道德性命之旨博之以詩書禮樂之文使其知
士之所以學蓋有卓然科舉文字之外者於是縣

人學子知所向慕至於里居士大夫之賢者亦攜子弟來聽席下無不更相告語相勉勵而自恨其聞之之晚也退而相與出捐金齋以佐其役合公私之力得錢幾七百萬而學內外煥然一新堂涂門廡靡不嚴備象設禮樂皆應國法蓋高君之於是學非獨其經理興築之緒為可書而其所以教者則非今世之為吏者所能及邑之人才風俗實有賴焉幸夫子悉書以告來者於無窮則諸生之望也予頃得識高君於會稽而知其賢今乃聞其政教之施於今者又有成效如此固已樂為之書矣而其邑之父兄子弟能率高君之教而有所興起皆知從事於古人為己之學而不汲汲乎誇多鬪靡之習以追時好以取世資則又予所深歎而尤樂取以告人者也乃為悉記其語使後之君子有考焉抑高君之於此邑嘗新其社稷之位而并兆風雲雷雨師於其側以嚴祀事穿故瀆疏積水

以防旱滂作社倉儲羨粟以備凶荒其所以事神治民之類能行其所學而皆出於至誠懇惻之意是以言出而人信從之蓋不止於講說之間然後以言教也嗚呼賢矣哉

元至正間燬

於兵明洪武初知縣謝德清移置今地正統間知

縣鄒旦買民地以擴之成化間知縣沈振重修嘉

靖初知縣何棟建尊經閣後知縣丁謹方逢時相

繼增修萬曆十六年知縣陳遴璋復建堂舍

國朝順治十七年教諭丁允齡募修康熙十五年教諭

顧智募修二十年知縣李先榮重修雍正四年宣

興分置荆溪縣以教諭專理宜興學事

荆溪縣儒學與宜興共學以宜興訓導專理荆溪學事

靖江縣儒學在縣治西南明成化八年知縣張汝華建正德嘉靖間知縣周竒健殷雲霄易幹增修知縣趙應旗引泮池作九曲勢與南市河通泮南作崇墉高三丈廣倍之崇禎初知縣唐堯俞移崇墉於市河之南十年知縣陳函輝重修

文廟

國朝康熙七年知縣鄭重增修

鎮江府

鎮江府儒學在府治東南宋太平興國八年知府
柳開創建於朱方門內寶元初范仲淹守郡乃拓
而新之元祐宣和間知府林希毛友相繼修葺紹
興九年燬於火知府程邁復營治劉子羽繼之大
為興復元至正間修葺明初改建於定波門內景

泰中知府張巖以學地卑隘復改建於縣治之東
同知俞端竟其役建明倫堂及四齋於山之西廟
廡堂齋橋門號舍厨庫射圃悉備大順元年知府
林鶚建尊經閣泮池石梁成化間知府熊祐重建
學門弘治中知府鄭傑作會講樓嘉靖十年制增
啓聖祠建敬一亭貯六箴碑各縣如之四十二年
知府秦淦於學之正南因岡增土名曰對山隆慶
萬厯間知府胡維新鍾庚陽吳搗謙王應麟先後

修理天啓五年

文廟燬巡按御史陸某捐貲重建

附

吳寬重修府學

記鎮江府之有學自宋歷元在府治之南國朝景泰間知府張侯以其地勢卑隘始東遷之至今五十年矣而頽壞已甚未有能修之者今茲鄭侯傑自大理寺丞來好文重士始謀以修學事移於巡撫都御史四明朱公公曰吾奉天子命以養民財固所當惜然以學校概視是不知務者即報使舉行侯又得承任郎曹費委之董其事責勤敏而公財不妄費功成規制宏美觀者稱歎於是教授董宗道等具修學始末來請文刻石蓋學之設古制也自三代以至今日上下數千年其間未有能廢之者以聖賢之道不可廢而道明於此也然所以明於此者非明於學校之地明於游學校之人

則其人之寄亦重矣哉孟子曰君子不下帶而道存焉故廟而祀之洋洋乎如在其上如在其左右者非夫人也聖賢也聖賢者道之所在也誦其言求其道用於鄉使習俗丕變於一時用於世使德業大行於百世然後稱乎游於此者此固朝廷崇儒之美意而有司之所奉行而不敢廢者也彼科第云者特假之以致吾身之階耳果足以為士子望哉故因記學之成而及之周洪謨禮

器樂器記

聖朝兩京國子監及天下郡縣皆廟祀孔子其肖像冕十二旒衣十二章祭器

十簋十豆樂舞六佾今命簋豆增為十二六佾增為八佾始用天子禮樂以其制通行天下歷代以來尊崇孔子未有盛於今日者也然諸郡禮器則全而樂器則或未備惟鎮江府學禮樂器俱全禮器千餘皆範銅為之乃元至正十二年總管李中教授黃鏞所鑄豆二百七十二其蓋數亦如之爵

一百三十九奠盤如爵之數蓋一百二十其蓋一百一十六簋一百十九其蓋一百十五犧尊六象尊六常尊三龍杓三楮花之瓶大小八蒸香之爐大小十六盥洗盆三毛血盤二諸器既完惟遵皆失舊常以豆之蓋代之今知府熊侯祐乃鑄銅為遵二百二十其蓋亦如其數竊惟古者祭器以竹以木以陶但竹木者易剝陶者易損故代之銅而圖其堅久也子往歲為南監祭酒始謁廟釋菜而見磁爵之缺者甚多不勝悚懼遂遣人赴饒州製補之夫以太學奉帝命以行禮者其器尚如此况諸郡縣乎用銅雖非古制而李中華所鑄歷三百餘年之久皆無少缺其視掬陶之剝損者則美惡判矣樂器亦當時所制銅鐘二十一石磬十六琴十瑟四以及笙管祝敔之類靡不畢備熊侯與其僚同知伍侯琇商榷以為前人所製固美恐其久而或忘乃寫書來求予筆諸石以防疎虞且約典

守者必嚴出納教授訓導但一秩滿者雖素不司
管銜必白於部會諸師生審驗之而後去於戲誦
遺經以出身者感聖恩如天地且愧不能報稱於
區區祭器儻不能守又何顏入禮殿乎雖然此禮
樂之器耳而行斯禮必本之敬奏斯樂必本之和
故孔子嘗曰禮云禮云玉帛云乎哉樂云樂云鐘
鼓云乎哉異時承祀之頃肅肅雍雍雍雍儀節不爽音
律克諧仰瞻聖賢之靈如在其上如在其左右則
必來格而款享矣抑禮樂本之心體之身者豈但
感乎神而已雖達之以道家國天下而無不理焉
則凡為治者其可不務
禮樂之本而雜之用乎

國朝順治初明倫堂圯知府塗廓捐貲買楊一清御書
樓改建康熙十一年知府高得貴重修二十七年

知府王燕重修雍正七年知府毛德琦重修

崇聖祠

名宦祠

鄉賢祠

各縣
學同

丹徒縣儒學舊在縣治西宋崇寧以後圮附於郡
學紹興中知縣趙學老復建元延祐六年教授朱
天珍重建明洪武初以淮海書院併入正統間燬
巡撫周忱重建天順中知府姚堂鑿泮池設門廡
立儒林坊成化中巡撫牟奉建尊經閣弘治末知
府王存忠拓廟基建德配天地道貫古今二坊嘉

靖初提學御史蕭鳴鳳以廟學湫隘遷於壽邱山
南麓

國朝順治十三年知縣張晉倡修康熙八年教諭王天
璧談志相繼修葺二十一年知府高龍光於學後
累石築牆以護龍脉雍正七年知府毛德琦重修
丹陽縣儒學在縣治東宋慶厯間建建炎中燬紹
興時知縣吳芑重建乾道六年知縣陳玠撤而新
之寶祐初知縣胡夢高又新之元因之明洪武中

知縣鄭士源許子英董復昌潘綏相繼修葺後知縣周志義包達陳誼先後增修弘治間知縣高謙移櫺星門於泮池之南嘉靖六年知縣張鳳翀鑿渠導湖水遶學宮南累土為紫山隆慶三年同知馬豸又開城西水竇引湖水遶之

國朝順治十七年知縣賀應旌重建尊經閣康熙十二年教諭蔣士偉重修兩廡五十二年邑人潘鐸葛任義殷聖莊共捐貲修正殿重建啓聖祠兩廡

櫺星門

金壇縣儒學在縣治東宋紹興初知縣李采重建元至元元年知縣于淵增修至正間燬於兵明洪武初知縣蔡原臣重建建文四年知縣孫時撤兩廡戟門而新之正統八年知縣劉訓撤明倫堂為東齋因重建明倫堂成化嘉靖間知縣劉觀張賓董相縣丞鄧繼曾相繼增修鑿泮池為三石梁萬曆十一年知縣許弘綱重修三十二年知縣邵應

貞又闢地新之

國朝順治十一年知縣趙介重修知縣宋蒞踵成之康熙九年知縣康萬寧教諭許允成增葺雍正四年邑紳士募修教諭盧艸董其事

溧陽縣儒學在縣治東南宋淳化間知縣夏侯戩建於縣西門外皇祐四年查宗閔徙於今地建炎末撤屋為營紹興以後相繼修葺而齋廡堂殿始備元陞為州學勅尊經閣後毀於兵明初知州林

慶復創建馬永樂十一年重修天順中燬明倫堂
獨存成化中知縣員賢漸次修復十五年知縣陳
福改明倫堂制度嘉靖間湯虺馬一龍增修

國朝康熙五年知縣徐一經重葺

文廟

淮安府

淮安府儒學在府治南門內宋景祐二年轉運使
魏廩建建炎間燬於兵嗣後屢建屢徙淳熙十年

知府王訥始仍故基重建嘉定八年知府應純之
大新學制元凡四加修治明洪武九年知府潘傑
重修正統七年知府楊理增修天順成化間知府
邱陵揚景先後增拓學地弘治六年知府徐鏞建
尊經閣官師廨舍俱備十七年巡撫張縉建興賢
毓秀二坊嘉靖十年制增啓聖祠建敬一亭貯六
箴碑各縣如之萬厯後知府陳文燭宋祖舜相繼
修治

國朝順治九年漕撫沈文奎重修康熙十八年總河靳輔捐俸修理二十四年淮揚道高成美捐俸增修雍正六年知府申程章修

大成殿十年教授黃施鐸修明倫堂

崇聖祠

名宦祠

鄉賢祠

各縣學同

山陽縣儒學舊建於滿浦坊尉司地元至元間遷於舊酒庫橋南至正時燬於兵明洪武初知縣羅傳道改建於察院西景泰初塑四配十哲像成化

五年巡撫滕昭知府楊景復拓地建廟學制與府
略同弘治後知縣樂護周好山黃日敬田孔陽相
繼修葺天啓四年知府宋祖舜知縣孫肇興重修
國朝康熙二十四年總漕徐旭齡知府高美修理櫺星
門雍正六年教諭王熙載復修九年分置阜寧縣
教諭訓導未分

阜寧縣儒學即廟灣鎮舊學以鹽城訓導理學事
鹽城縣儒學在縣治南宋紹興間知縣黃萬頃建

自宋至元凡三燬於兵明洪武初知縣陳天瑞重建永樂景泰成化間相繼修治正德初知縣王明徹重修嘉靖間知縣姜潤程焯葉露新先後修葺萬曆九年知縣楊瑞雲增修

國朝康熙十年教諭張星軺募修三十三年知縣武臯修

聖殿兩廡四十八年知縣馬化蛟修文昌樓儀門五十二年知縣盛弘邃修明倫堂雍正二年知縣于

本宏修文昌樓敬一亭七年知縣孫蔭孫修明倫堂

清河縣儒學宋德祐初建於舊縣之西大清河口

景定元年河決縣遷治甘羅城學隨之元末燬明

洪武初知縣孔克勲改建於縣治東南小清河口

正統五年署縣事知州李信圭天順時知縣盧寧

修成化後提學陳選張縉以次修造知縣劉慧作

泮池而橋之正德中提學張璿建櫺星門講堂號

舍嘉靖間知縣吳宗吉加葺隆慶間知縣張惟誠
重修天啟元年河決學宮遂圯三年教諭高崇毅
遷於舊基西北數十步以遠河患漸次增造

國朝順治六年教諭閻補宸加修康熙十二年訓導朱
彝復修十七年知縣王登龍重建啓聖祠及兩廡
十八年增建尊經閣二十七年知縣管鉅培甬道
以達儀門三十年大修五十九年署縣事王三謙
重修尊經閣六十年知縣郎燦重修明倫堂雍正

九年署縣事戴昕重修

正殿

桃源縣儒學在縣治南元縣尹劉整建後燬於兵
明洪武初知縣汪仁重建正統景泰間知縣張端
趙紀增修弘治後知縣崔獻李廷鵬黃時康王敬
賓曹夔相繼修葺萬厯間知縣華存禮龔爽重修
國朝順治十四年知縣鄭牧民重修康熙七年圯十九
年知縣萬謙教諭史逸嗣訓導劉蕃募資修建四

十九年知縣田養民重修

大成殿明倫堂兩廡雍正七年知縣賈文煥率紳士
重建

大成殿

安東縣儒學在縣治東南元至正間安東萬戶張
漢英始建後燬於兵明洪武三年知縣束贊重建
宣德七年典史栗整重修景泰初教諭葉瑾邑人
梁壁重修天啓三年教諭潘士謙重建 正殿高

廣於舊制崇禎間知縣王敬承教諭史龍瑞重修
國朝順治初知縣劉聘加修康熙九年大水廟學頽廢
十一年訓導吳正名顧焜重修雍正四年運判張
涵邑人程鑾修 正殿兩廡程俊孫朝宗捐修
崇聖祠明倫堂

揚州府

揚州府儒學在府治後儒林坊宋建明洪武中知
府周原福因舊規重建東有成賢坊西有育才坊

及藏書樓射圃觀德亭頤貞堂玩易亭祭器庫文昌樓並官廨正統間知府韓宏因藏書樓改建崇文閣即今尊經閣也又建更衣采芹二亭天順成化間御史張黼知府鄭岑先後修葺嘉靖四年燬知府易瓚重建八年知府陶儼成之十年奉詔建啓聖祠及敬一亭貯六箴碑各縣如之萬厯後知府朱錦韓文鏡增修

國朝康熙十九年巡鹽御史郝浴知府崔華捐貲修理

教授秦鉅倫朱虹訓導丁德明先後踵成之二十二年巡鹽御史裴充美復修文昌樓

崇聖祠

名宦祠

鄉賢祠

各州學同

江都縣儒學在縣治北宋紹興十二年州守許中建明洪武七年知縣朱啓重建宣德間知縣謝必賢修正統三年運使嚴正建崇文閣成化間巡按董韜知府鄭岑周源相繼創修學制大備嘉靖三十一年知府吳桂芳重修三十八年商人黃煥建

文奎樓於學門內

國朝康熙九年教諭吳伯琮捐修十九年巡鹽御史郝
浴捐修二十二年教諭許維挺訓導汪和中畢其
工費門外繚以周垣東西設圈門為玉帶巷雍正
四年知縣王元稗重建敬一亭九年江都分置甘
泉縣以教諭專理江都學事

甘泉縣儒學與江都共學以江都訓導理甘泉學
事

儀徵縣儒學在縣治東宋慶厯四年始建州學於城西南隅後燬於兵紹興中知府張好古復建學於城南元泰定間知州張震復新之明洪武初改州學為縣學知縣劉文綱康彥民相繼修葺萬厯十三年知縣樊養鳳遷學官於資福寺仍寺前巨浸為泮池引淮水入泮跨以石梁規模畢備

國朝順治九年同知李淮重修

文廟康熙五年教諭舒文燦倡修二十八年知縣馬

章玉重修四十六年巡鹽御史曹寅重修明倫堂

附

朱彝尊記

古之造士立學士之志於道者必於鄉校事其師記曰禮聞來學不聞往

教當其盛時無小無大從公于邁及其廢則曰縱我不住子寧不來而又繼之曰一日不見如三月兮是故博習者必親師論學者必取友學者有失教者知之長其善而救其失藏焉修焉息焉游焉安於所居之地夫然後師嚴道尊民知敬學也已學之制非一虞庠上下夏序東西殷膠左右周保博所記為學有五漢立三雍晉興兩學至於唐分學為七三品以上子孫國子學教之五品以上子孫太學教之曰廣文以領國子生之業進士者曰四門以授七品之子及庶人之俊異子弟律學以講律令格式書學以考篆籀分隸真草章行篆學以明億兆京垓秭壤溝澗正載斯成德達材各有

其選教之亦多術矣自宋而後雖於州郡縣學之外兼設山長然書數之學輒勿講科目之繁既省士子分治五經專習四子家各有師不必問業於鄉校而儀徵縣治當江介之衝舊為江淮發運之所邦人多鹽筴之利其子弟注籍於學束脩之禮適名於校官歲一再至而已戟門之缺傾泮水之泮濁文廟之泚泮講堂廣舍之榛蕪守土司教者第肯坐懸行數已焉通政使司巡視兩淮鹽課監察御史曹公愷商以仁待士以禮每因秤掣至縣布寬大之條軸轆銜接柁鼓榜歌於是公年五十矣高網亭戶咸思進酒於公醴白金二十鎰稱壽公却之再三適公乘憊過市遮馬拒輪以請公乃召汪訓導教詒語之曰縣學之不修久矣吾無私財以鳩工也苟若以衆所率之錢新多士肄業之地庶幾邑子享人爵之報乎於馬象皆悅頌公之無私而克廣德心也歲之某月誕治泮宮工匠陶

菴各程其材自西徂東百廢具舉由是諸生問業有所來親其師人知敬學爾乃伐石以志重修之歲月曹公名寅字子清一字荔軒滿州人五十一年教諭盛安文重修

啓聖祠五十三年許彪重建尊經閣於舊址五十六年知縣陸師重修

高郵州儒學在州治東宋至和二年知軍事邵必始建開禧中知府林伯成撤而廣之元燬於兵明洪武初知州黃克明因舊址重建十七年同知彭蠡重修天順四年義民周全又大修弘治後知州

程憲趙來亨范惟恭相繼修葺

國朝順治十四年知州吳之俊學正詹尹吉重修康熙
二十年知州李培茂修 正殿四十年學正吳謙
重修四十三年監生陳朝佐捐田三百畝於學四
十七年學正鄧紹煥鬻田以竣工雍正二年知州
張德盛重修

興化縣儒學在縣治西南宋天聖中知縣范仲淹
建元末燬於兵明洪武三年知縣徐士誠改建今

地嘉靖三十七年知縣程鳴伊重修

國朝康熙十一年知縣程起鵬修二十三年知縣張可
立修六十一年教諭阮無忝重修署縣事王慎捐
貲襄其成

寶應縣儒學在縣治南宋嘉定間知縣賈涉建元
末燬於兵明洪武初知縣王驥即故址修復嘉靖
後知縣李瓚陳可大韓介耿隨龍相繼修葺益增
廓之

國朝順治十四年邑人朱爾遠胡克濟等募修

秦州儒學在州治東南唐置吳州始建學宋紹興
中州守王揚英作宣聖廟於城東隅即廟建學

元燬於兵明洪武初知州張遇林即故址建永樂
後知州劉景文蕭旭相繼修葺正統間知州黃性
重修成化二十年知州彭福拓東南故址移建學
門植華表二左文雅右儒林弘治後知州謝傑朱
登益增修萬厯間撫院李三才檄江防同知攝州

事李仙品修學濬河規制大備

國朝因之

徐州府

徐州府儒學在城東北隅去府治百步舊在東南
隅元至正時燬於兵明洪武三年知州文景宗重
建於府東北隅宣德景泰間知州楊祕宋誠增修
天順六年知州王叙拓而大之重建廟廡易樞星
門以石成化十年知州陳廷璉建明倫堂正德初

副使柳尚義增置齋房號舍嘉靖十年制增啓聖
祠建敬一亭貯六箴碑各縣如之十三年知州魏
頌重修後河決學基成沼隆慶間知州章世貞白
於總河翁大立以永福倉址改建其後知州劉順
之副使馮敏功畢其工漸復圯壞萬歷四十四年
副使袁應泰移建左衛舊址天啓初河決水繞學
宮外崇禎間文廟災兵道何騰蛟遷建於東察
院

國朝順治七年兵道胡廷佐倡修知州余志明學正譚
學準訓導蔡尚廉踵成之康熙二十一年淮徐道
劉元勳知州臧興祖遷建於府治之東州紳士張
膽董成之四十一年知州佟國弼重修五十六年
知州姜焯增修廟學規制始備雍正十一年州陞
為府以州學為府儒學

崇聖祠

名宦祠

鄉賢祠

各州縣
學同

銅山縣儒學與府共學以府訓導理銅山學事

蕭縣儒學在縣治西南隅宋舊址在西北隅紹聖間徙置城東後為河水衝齧元至正間縣尹耶律廷瑞卜建於河西元末燬明洪武初主簿劉瑜重建正統十三年知縣柳新改造

文廟正德十六年巡按御史甯欽移建於華嚴寺東獄觀之地萬歷五年河決廟毀知縣伍維翰遷建於縣治之東四十六年知縣蕭學儼復遷於縣治之西南即今地

國朝順治五年知縣祖永勳修而新之康熙四十九年
知縣徐大生重修

碭山縣儒學舊在縣治西北唐貞觀四年建宋元
祐間邑人王惠捐貲遷東北隅元大德十一年縣
尹楊泰移建於漢高祖廟故址明永樂四年知縣
郝玘重建正統五年知縣杜釗增修嘉靖四十一
年河決學圯隆慶間知縣戴偉王廷卿相繼修建
萬歷間知縣尚誠以其地洿下又易西華池北三

十六年知縣熊應祥改遷今址

國朝順治十四年知縣曾為履捐修康熙二十一年邑人陳鼎新重修六十一年知縣王晉重修

豐縣儒學舊在縣治東金末燬元至正間縣尹郭瑄重建尋又燬於兵明洪武六年知縣曾本重建宣德後知縣闕膺張昇鄺頤相繼修葺旋因水圯正德十五年知縣裴爵復建嘉靖五年又沒於水二十一年知縣李崇信創建於新縣治之東三十

一年知縣徐瑩復建於舊縣治之西北三十九年
知縣胡義心又改建縣治東南

國朝順治二年知縣顏瑄教諭陳彝訓導江能容大修
制度畢備康熙三十五年知縣李振教諭黃師晟
重修拓東西基各數武雍正五年知縣魏學謚重
修

沛縣儒學舊在河東泗亭坊宋靖康中燬金大定
間徙建河西元至正間復燬明洪武初知縣黃忠

信重建永樂間知縣常瓘李舉賢增葺嘉靖八年
河決學圯知縣王治易龍泉寺址改建四十四年
再圯於水隆慶三年知縣白經改建明倫堂兩廡
徙啓聖祠於廟東萬歷二年知縣劉順之捐修二
十四年立作聖成材二坊

國朝康熙二十九年邑人募輸重建各祠

邳州儒學在州治東南創自宋興隆間元末燬明
初判官裴珏重建成化間判官曹卿改建弘治間

知州李文聰修葺嘉靖後知州高巖王德廣馬京
踵修之

國朝順治十年學正蔣曜孫大經復加修建康熙七年
學圯十八年管河同知蘇崑知州李纘宗與學正
胡圭訓導許來惠改建於南隄之東先營廟殿二
十年落成二十四年大水學正孟安世訓導許來
惠隄障獲全二十六年知州孫居湜倡捐修造

宿遷縣儒學舊在縣治東南元至正二十八年縣

尹張彬創址元貞初縣尹蕭世榮成之元末兵燬
明洪武二年縣丞方鐸重建永樂正統間歷有修
葺成化五年提學御史謝選撤新之嘉靖末圯知
縣陳嘉道重修萬歷五年復為河水衝齧知縣喻
文偉改建於縣治之左

睢寧縣儒學在縣治東南元至元初知縣王榮祖
始建元末燬於兵明洪武六年知縣葉見泰教諭
林德乾重建宣德末知縣衛鏞景泰初知縣張鈺

正德間知縣黃守濂劉景沂各增修嘉靖後知縣
喬鎮徐密相繼修葺明季水圯

國朝順治四年知縣殷岳建 正殿兩廡明倫堂八年

知縣魏翰建櫺星門戟門康熙元年知縣馮缺麒

建啓聖祠興賢育才二坊學制大備四年知縣石

玫建青雲亭二十五年知縣謝乃實修三十七

年知縣章之瑤教諭李燦瑞重修

太倉州

太倉州儒學在州治西南明正統間巡撫侍郎周
忱即水軍都萬戶府第始建衛學弘治十年置州
知州李端即衛學改州學築道山嘉靖九年知州
陳璜建尊經閣十年制增啓聖祠建敬一亭貯六
箴碑各縣如之萬歷間知州丁永祚陳騰鳳相繼
修葺

國朝順治十七年知州呂時興重建尊經閣康熙二十
三年學正李煜修 正殿三十九年知州茹之增

修兩廡及戟門五十年訓導曹培源重修雍正四
年太倉州分設鎮洋縣以學正專理太倉州學事

崇聖祠

名宦祠

鄉賢祠

各縣
學同

鎮洋縣儒學與太倉州共學以太倉州訓導理鎮
洋學事

崇明縣儒學在縣治濠外東南隅宋嘉熙間嘗立
書堂元始建州學至正間改遷明洪武初改為縣
學正統成化間制度漸備嘉靖二十九年築平沙

土城乃卜遷學三十年兵備道熊桴改遷於東街
營建如初萬歷六年知縣何懋官又改遷於東南
小教場十六年築長沙磚城知縣李大經又遷學
於縣治東南天啓二年知縣唐世涵始遷今地

國朝順治十五年知縣陳慎修葺康熙三年總鎮張大
治知縣龔榜增修雍正五年知縣張文英重建文
昌閣

嘉定縣儒學在縣治南宋嘉定十二年知縣高衍

孫建元元貞二年陞州學明洪武二年復為縣學
天順四年知縣龍晉大修殿廡築土山於學南名
曰應奎成化間知縣洪冕白思明吳哲劉翔相繼
修治嘉靖十六年知縣李資坤增修萬歷十八年
知縣熊密夷土山之十七濬為潭名曰匯龍

國朝順治十二年知縣劉弘德教諭王彬修建祠閣堂
解康熙六年知縣金敏修

聖殿重建兩廡二十二年知縣聞在上增修雍正四

年嘉定縣分置寶山縣以教諭專理嘉定學事

寶山縣儒學與嘉定共學以嘉定訓導理寶山學事

海州

海州儒學在州治西唐貞觀四年創建元皇慶二年知州魏榮重建元末燬明洪武二年知州陳德輔重建弘治初知州趙廷珪大修後知州趙儒重修嘉靖十年制增啓聖祠建敬一亭貯六箴碑各

縣如之三十二年知州鍾岳改建歲久漸圯

國朝康熙十四年學正武威遠重修

聖殿十八年訓導倪田玉重修櫺星門二十一年學
正吳植重修兩廡

崇聖祠 名宦祠 鄉賢祠

各縣
學同

贛榆縣儒學舊在縣治東元燬於兵明洪武四年
縣丞莫從敬遷於縣治東南正統三年知縣郭文
中重修成化十四年知縣王舉重修嘉靖二十五

年揚州推官符允中海州知州鍾岳捐貲修葺萬
歷間知縣樊兆程徐應元相繼增修明季燬於兵
國朝順治八年知縣穆爾謨教諭劉思問重建十三年
邑人董宗鼎重建門廡康熙七年圮訓導章憲捐
募修建十一年知縣俞廷瑞訓導章憲捐募復修
兩廡

沐陽縣儒學在縣治南洪武三年知縣馮益創建
正德間燬知縣易瓚重作廟廡橋門庖庫堂齋號

舍皆備嘉靖四年知縣蔣賜遷於縣治東萬歷三十三年教諭蕭鳴盛復遷城南故址

國朝順治十年知縣王國泰增設奎星樓康熙三年知

縣梁文煥增修七年學圮十二年知縣張奇抱重

加修理

附

胡簡敬重修儒學記

吾沐寮適東省泗水嶧山之閒循車

轍馬跡而覽其盛者往返祇旬日耳去聖人之居若此之近瞻其宮闕之巍哉禮樂之隆備車服俎豆之尚煌宜有所觀感而興起是以吾沐學制雖經遷改仍復故基考前者之經營其規樞結構亦差堪與鄒魯相望也自康熙七年地震學官惟聖殿僅存其他堂廡屏祠以及數仞之牆皆蕩為飛

塵碎礫致殿階之下雜園蔬而溷芻牧無復有藩
籬之隔多士翔望揖父母師長之側不過露立須
臾循故事而散春秋奉祀亦無所謂麗牲之石省
濯之房寒燠蓬蒿數器以一簣出納之及行鄉飲
酒禮主賓俱介萃率拱揖於覆茆架木之下如此
者已多歷年所三韓張侯以癸丑春莅任首謁先
師廟乃慨然集師儒多士謀之謂是一邑首善地
奈何聽其荒蕪至此願捐俸以為之先都人士其
多方贊成之於是鳩工庀材經營伊始即為久遠
之謀亦似有神焉思車周迴於泗水嶧山之間審
其差等而著為心畫者既成功爰集鄉之博士弟
子進而告之曰侯之為此豈特為崇廟貌侑神饗
哉深望肄業有地以聖人所求乎已者求之多士
爾侯且月給薪俸豐酒膳擬闡中題以校士躬
為品題即士子之工制業取科名又未嘗不於侯
是賴侯作人之功其可忘諸侯三韓人名奇抱號

藏錦由貢士初
任沐陽縣知縣

通州

通州儒學在州治東宋太平興國五年知州曾環
始建於城東一里許乾興元年知州王隨遷學於
東門內大觀間燬於兵紹興間判官方雲翼復建
於舊址淳熙間又燬咸淳中知州馮弼重建元至
正間將軍張弘綱建

大成殿明洪武三年知州熊春增修正統九年郡人

僉事陳敏千戶陳瑄重修成化弘治間歷加修葺
嘉靖十年制增啓聖祠建敬一亭貯六箴碑各縣
如之三十二年巡鹽御史黃國用命知州游天庭
重建尊經閣

國朝順治二年知州唐虞泰重修康熙二年知州畢際
有重修泮宮坊九年知州王廷機增修雍正二年
知州白映棠重修五年知州李世喬捐修明倫堂
舊有海門縣明嘉靖二十四年知縣江執創建儒

學於縣治東今為海湖所蓄城圯裁縣歸通州改
為海門鄉學省

崇聖祠

名宦祠

鄉賢祠

各縣
學同

泰興縣儒學在縣治東宋紹興間建元季燬於兵
明洪武二年知縣李秉直重建後漸增修正德間
知縣鄭浙鼎新之嘉靖後知縣朱麓許希孟朱南
雍高桂陳繼疇相繼修葺拓泮池增櫺星門石柱
二曰江漢秋陽鑿大池曰鯤化池甃以石崇禎間

導河入泮前鯤化池

國朝康熙十二年邑人御史李振宜捐修二十五年教諭荆子邁濬池曰紺寒池築臺山上曰光霽臺

如臯縣儒學舊在縣治東北南唐保大十年建宋紹興初遷於縣治西南元末兵燬明洪武三年知縣謝得珉創建嘉靖十九年知縣黎堯勳移建縣治東南萬歷後圯於風潮知縣鄭人達修造始築宮牆易土以磚後知縣陳煥張星李廷材熊奮渭

李衷純相繼修葺

國朝順治十四年知縣崔鳳賓重修康熙十年知縣趙
弘化重修貢生蘇世威董其役雍正十年知縣彭
履仁教諭丁弘遠訓導慶翹重修



江南通志卷八十八